

ԱՉԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ՔՈՒԵՅԹԻ ԵՒ ԱՐԱՐԱԿԱՆ ԾՈՑԻ ԵՐԿԻՐՆԵՐՈՒ ԹԵՄԻՆ
P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: q8church@yahoo.com

ՆՈՐ ՇՐՋԱՆ, 2. Տարի, Թիւ 215, Ուրբաթ, 24 ՅՈՒՆՈՒԱՐ, 2014

ՀԱՄԱՅՆՔԱՅԻՆ

Լուրեր Ազգային Առաջնորդարանէն

Չորեքշաբթի, 22 Յունուար 2014-ին, Քուէյթի եւ Շրջակայից Թեմի կաթողիկոսական փոխանորդ՝ Գերպ. Տէր Մասիս Ծ. Վրդ. Զօպույեան, ընկերակցութեամբ՝ ՀՀ Արտակարգ եւ Լիազօր Դեսպան Տիար Ֆատէյ Չարչոյլեանի եւ Սրբոց Վարդանանց Եկեղեցոյ Հոգեւոր Հովիւ Արժ. Տէր Արտակ Քինյ. Քէհեաեանի, հանդիպում մը ունեցաւ Քուէյթի Էմիրի քրոջ՝ Շէյխա Ֆարիհա Ալ Ահմատ Ալ Ճապեր Ալ Սապահի հետ, վերջինիս անձնական գրասենեակին մէջ: Հանդիպման ընթացքին Շէյխա Ֆարիհան ուրախութեամբ անդրադարձաւ Քուէյթէն ներս հայերու դրական ներկայութեան մասին: Իսկ Գերպ. Հայր Սուրբը շեշտեց իսլամ-Քրիստոնէայ համակցութեան մասին, կարեւորելով Քուէյթի իշխանութեան ազնիւ վերաբերմունքը, որ բաւարար կարիլիութիւններ կ'ընձեռէ կազմակերպելու եկեղեցական բոլոր ծիսակատարութիւններն ու արարողութիւնները:



Հանդիպման ժամանակ Հայր Սուրբը գոհունակութեամբ անդրադարձաւ նաեւ երկու երկիրներու՝ Հայաստանի եւ Քուէյթի բարեկամութեան հաստատման եւ ամրացման ի խնդիր տարրուղ աշխատանքներուն:

Կիրակի, 19 Յունուար 2014ին, Քուէյթի մէջ Ղպտի եկեղեցոյ հոգեւոր հովիւ Ապունա Պիկոյի հրաւերով, Գերպ. Տէր Մասիս Ծ. Վրդ. Զօպույեան, Սրբոց Վարդանանց Եկեղեցոյ Հոգեւոր Հովիւ Արժ. Տէր Արտակ Քինյ. Քէհեաեանի եւ Ազգային Վարչութեան աստենապետ Պրն. Վարդան Նարինեանի ընկերակցութեամբ ներկայ գտնուեցաւ Ղպտի եկեղեցոյ Սուրբ Ծննդեան տօնին առթիւ տրուած ասանդակական ընթրիքին: Յանուն Քուէյթի Ազգային Վարչութեան եւ հայ համայնքին Գերպ. Հայր Սուրբը շնորհաւորեց Ղպտի Եկեղեցին Սուրբ Ծննդեան տօնին առթիւ եւ լաւագոյն բարեմաղթութիւնները փոխանցեց:



Երեկոյի պատուաւոր հիւրն էր Քուէյթի Էմիրին քոյրը՝ Շէյխա Ֆարիհան: Հայր Սուրբը Շէյխա Ֆարիհայի հետ ունեցաւ կարճ հանդիպում մը, որուն ընթացքին վերջինս անցնող տօներու առթիւ շնորհաւորեց քուէթահայ համայքը, փոխանցելով իր ջերմագին բարեմաղթութիւնները:

Երկուշաբթի, 20 Յունուար 2014ին, Քուէյթի մէջ կայացած Արաբական Խորհրդարաններու Համաժողովի ծիրէն ներս պաշտօնական ընդունելութեան մը ընթացքին Թեմիս Կաթողիկոսական Փոխանորդը, ընկերակցութեամբ Սրբոց Վարդանանց Եկեղեցոյ Հոգեւոր

Հովի Արժ. Տեր Արտակ Քինյ Քէհեաեանին, հանդիպեցաւ Լիբանանեան պատուիրակութեան հետ (Ռոպէր Ղանեմ, Այուպ Հմայետ, Միշէլ Մուսա եւ Քասեմ Ապտուլ Ազիզ):



Գերպ. Հայր Սուրբը հակիրճ ձեռով անդրադարձաւ քուէթահայ համայնքի պատմութեան, ինչպէս նաեւ ներկայիս անոր տարած աշխատանքներուն եւ գործունէութեանց:

Քուէթէն ներս Լիբանանի Հանրապետութեան Դեսպան Տոքթ. Խըտըր Հալուի, ինչպէս նաեւ պետական հիւրերը անդրադարձան Լիբանանէն եւ Միջին Արեւելքէն ներս Մեծի Տանն Կիլիկիոյ Կաթողիկոս Ն.Ս.Օ.Տ.Տ. Արամ Ա.ի հիմնական եւ կարեւոր ներկայութեան մասին՝ տարածաշրջանին մէջ խաղաղութեան եւ արդարութեան հաստատման համար:

Երեքշաբթի, 21 Յունուար 2014ին Թեմիս բարեջան Կաթողիկոսական Փոխանորդ Գերպ. Տեր Մասիս Ծ. Վրդ. Զօպույեան, Արժ. Տեր Արտակ Քահանայ Քէհեաեանի եւ Ազգային Վարչութեան ներկայացուցիչներ՝ պարոնայք Վահան Մարտիրոսեանի եւ Ռաֆֆի Յովսէփեանի հետ իր անդրանիկ այցելութիւնը կատարեց Քուէթէն ներս Լիբանանի Հանրապետութեան Դեսպանատուն եւ հանդիպեցաւ Դեսպան Տոքթ. Խըտըր Հալուիի հետ:



Հանդիպումը ծանօթացման առիթ մըն էր, ուր Արժ. Քահանայ Հայրը Պրն. Դեսպանին ներկայացուց Հայր Սուրբը:

Հանդիպման ժամանակ անդրադարձ կատարուեցաւ Միջին Արեւելքի զգայուն իրավիճակին մասին: Պրն. Դեսպան, անդրադառնալով Լիբանանեան կեանքին, լաւատեսօրէն նշեց նոր կառավարութեան հաստատման մասին, մասնակցութեամբ լիբանանեան քաղաքական դաշտի բոլոր ներկայացուցիչներուն:

Հայր Սուրբը Պրն. Դեսպանին փոխանցեց Ազգային Վարչութեան եւ հայ համայնքի ջերմ ողջոյնները, անդրադառնալով տարբեր ոլորտներու մէջ համայնքին տարած աշխատանքներուն եւ գործունէութեանց: Պրն. Դեսպան ուրախութեամբ բացայայտեց իր տիկնոջ հայ ըլլալու եւ Լիբանանի մէջ հայերուն հետ մօտէն շփուած ըլլալու փաստը (մասնաւորաբար Թրիփոլիի հայերուն հետ): Աւարտին Պրն. Դեսպան խոստացաւ բոլոր առումներով օգտակար ըլլալ հայ համայնքին:

**ՄԵԾԻ ՏԱՆՆ ԿԻԼԻԿԻՈՅ ԿԱԹՈՂԻԿՈՍՈՒԹԵԱՆ
ԿԵԴՐՈՆԱԿԱՆ ՎԱՐՉՈՒԹԵԱՆ
ԼԻԱԿԱՏԱՐ ՆԻՍՏԵՐ ԱՆԹԻԼԻԱՍԻ ՄԷՋ**

Նախագահութեամբ՝ Ն.Ս.Օ.Տ.Տ. Արամ Ա. Վեհափառ Հայրապետին, 23-25 Յունուարին Անթիլիասի մէջ պիտի գումարուին Մեծի Տանն Կիլիկիոյ Կաթողիկոսութեան Ազգային Կեդրոնական Վարչութեան Կրօնական եւ Զաղաքական Ժողովներու լիակատար նիստերը: Թեմիս Բարեջան Կաթողիկոսական Փոխանորդ Գերպ. Տ. Մասիս Ծ. Վրդ. Զօպույեան սոյն ժողովներուն մասնակցելու նպատակով մեկնեցաւ Լիբանան:

Ն.Ս.Օ.Տ.Տ. ԱՐԱՄ Ա. Վեհափառ Հայրապետի Պատգամը

Ուրբաթ, 19 Յունուարին, ընթացս Սուրբ եւ Անմահ պատարագին, Մրբոց Վարդանանց Եկեղեցւոյ մէջ ընթերցուեցաւ Մեծի Տանն Կիլիկիոյ գահակալ Ն.Ս.Օ.Տ.Տ. Արամ Ա. Վեհափառ Հայրապետի Նոր Տարուան պատգամը, որով 2014 տարին կը հռչակուէր «Տարեցներու Տարի»:



Նախորդ թիւով ներկայացուցած էինք Վեհափառ Հայրապետի պատգամն ամբողջութեամբ: Այսու ամփոփ ձեւով կը ներկայացնենք զայն.-

Մեր նախաձեռնած աւանդութեան համաձայն, իւրաքանչիւր տարին կը ձօնենք մեր ժողովուրդի կեանքին հետ անմիջականօրէն աղերս ունեցող արժէքի մը, երեւոյթի մը, մտահոգութեան մը կամ նպատակի մը, հրաւիրելով մեր ժողովուրդի զաւակները ամբողջ տարուան ընթացքին այդ մասին խորհրդածելու, անհատապէս թէ հաւաքաբար, ու մանաւանդ գործնական քայլերու դիմելու՝ ի խնդիր մեր ազգի առաւել ծաղկման, մեր եկեղեցւոյ պայծառութեան ու մեր հայրենիքի հզօրացման:

Նկատի ունենալով հայ ընտանիքէն եւ ընդհանրապէս մեր հաւաքական կեանքէն ներս տարեց սերունդին կատարած յոյժ կարեւոր դերը ու անոր նկատմամբ մեր ունեցած խոր սերն ու բարձր յարգանքը, 2014 տարին կը հռչակենք՝ «ՏԱՐԵՑՆԵՐՈՒ ՏԱՐԻ»:

Պետութիւններ յառաջացեալ տարիքի մէջ գտնուող անձերուն նկատմամբ ճիգ չեն խնայեր որ անոնք լաւագոյն պայմաններու մէջ ապրին իրենց երկրաւոր կեանքի վեր-ջալոյսը: Յատկապէս արեւմտեան ընկերութենէն ներս մեծածախս ծրագիրներ կը մշակուին տարեցներու կենցաղային, բնակարանային, տնտեսական ու ընկերային երեսներուն առնչուած: Նաեւ մեր ժողովուրդին վերաբերումը հին սերունդին նկատմամբ սկսած է փոխուիլ վերջին տասնամեակներուն: Սակայն կը սպասենք աւելի՛ն:

Ներկայ տարին "Տարեցներու Տարի" հռչակելով կ'ուզենք հայրապետական Մեր բարձր գնահատանքը յայտնել տարեց սերունդին օգտակար հանդիսացող մեր բոլոր միութիւններուն, բարերարներուն, ինքնակալութիւններուն, բժիշկներուն ու բոյժբոյրներուն: Միրելիներ, ինչ որ կը կատարէք՝ աստուածահաճոյ գործ է: Միշտ յիշեցէք Աւետարանի «Բարի Սամարացի»ին առակը (Ղուկ. 10.30-37) եւ շարունակեցէ՛ք ձեր նուիրեալ ծառայութիւնը առաւել՝ հաւատքով ու նուիրումով:

Այս առիթով, մեր ջերմ թելադրութիւնն է.-

ա) Իւրաքանչիւր ընտանիքի առաջնահերթ ու նուիրական պարտականութիւնը պէտք է ըլլայ իր տարեց անդամներուն նկատմամբ անհրաժեշտ հոգածութիւն ցուցաբերել բարձրագոյն աստիճանի նախանձախնդրութեամբ:

բ) Մեր ժողովուրդի զաւակներուն, եւ յատկապէս մեր նոր սերունդին մօտ տարեցներուն նկատմամբ մեր ունեցած յարգանքը, սերն ու նախանձախնդրութիւնը անհրաժեշտ է աւելի խորացնել: Այս ուղղութեամբ մեր ընտանիքները, դպրոցներն ու սկումբները վճռական դեր ունին կատարելիք:

գ) Անհրաժեշտ է նիւթապէս սատարել գործող ծերանոցներու եւ ընկերաբժշկական կեդրոններու գործունէութեան, որպէսզի անոնք կարենան առաւել եւս բարելաւել ու ծաւալել իրենց մարդասիրական ծառայութիւնը:

դ) Տարեցներու գծով մեր հոգածութիւնը աւելի կազմակերպ դարձնելու մտահոգութենէն մղուած, անհրաժեշտ է նոր ծրագիրներ մշակել արդիական ու մասնագիտական մօտեցումներով: Մեր ունեւոր ազգայինները պէտք է լրջօրէն մտածեն յիշեալ կարիքներուն մասին:

ՀԱՅԿԱԿԱՆ

Հերոս Զինուորին Յուղարկաւորութիւնը՝ Եռաբլուրի Մէջ. «Սահմանին Վրայ Լարուածութիւնը Հասած Է Քազաթնակէտին» Կ'ըսէ Մէլրան Օհանեան

Հայաստան Չորեքշաբթի օր հրաժեշտ տուաւ մերօրեայ հերոս, Հայաստանի զինեալ ուժերու զինուոր Արմէն Յովհաննիսեանին: Եռաբլուրի մէջ հաւաքուած էին բազմաթիւ անձնաւորութիւններ՝ հրամանատարներ եւ քաղաքային պաշտօնեաներ՝ հրաժեշտ տալու 20 Յունուարի լուսցող զիշերը ազրպէյճանական ներթափանցումի իբրեւ արդիւնք հերոսաբար զոհուած զինուորին:



Հերոս զինուորին յուղարկաւորութիւնը կատարուեցաւ զինուորական կարգով՝ արցախեան ազատամարտին ընթացքին զոհուած քաջերուն կողքին:

Յուղարկաւորութեան մասնակցած Հայաստանի պաշտպանութեան նախարար Մէլրան Օհանեան ըսաւ, որ Արմէն Յովհաննիսեան իր երկրային կարճատեւ կեանքին ընթացքին մեր սրտերուն մէջ վաստկեցաւ մշտապէս մնալու իրաւունքը:

Նախարարը նշեց, որ հակառակորդը արժանի հարուած ստացած է տեղույն վրայ. դիրքին մէջ կանգնած, ինը հոգիէ բաղկացած սովորական ստորաբաժանումը ետ մղած է Ազրպէյճանի յատուկ նշանակութեան ստորաբաժանումի երկու խումբեր՝ շուրջ 30 հոգի, ինչ որ արդէն մեծ հերոսութիւն է:

«Հայաստանի եւ Արցախի մէջ լաւ կը հասկնան պաշտպանութեան զինը եւ ամուր կանգնած են սահմանին վրայ: Արմէնի օրինակը պիտի տարածուի ստորաբաժանումներուն մէջ եւ անով պիտի ոգեւորուին մեր զինուորները: Շուրջ երկու օր է, որ սահմանին վրայ լարուածութիւնը հասած է իր գագաթնակէտին: Երբեւէ այս քանակութեամբ կրակոցներ չեն եղած: Հասկնալի է՝ մտավախութիւն կայ, որ պատիժներ պիտի ըլլան: Մենք պահը պիտի գտնենք», ըսաւ Օհանեան:

Նալբանդեան Եւ Մամետեարով Պիտի Հանդիպին 24 Յունուարին

Հայաստանի արտաքին գործոց նախարարութեան բանբեր Տիգրան Բալայեան «Թուիթըր» ընկերային ցանցի իր էջին մէջ տեղեկացուցած է, որ Հայաստանի արտաքին գործոց նախարար Էդուարդ Նալբանդեանի հանդիպումը Ազրպէյճանի արտաքին գործոց նախարար Էլմար Մամետեարովի հետ տեղի պիտի ունենայ 24 Յունուարին՝ Փարիզի մէջ:



Փերինչեքի Հարցով Քաղաքական Հանդիպում՝ Փարիզի Մէջ Զուիցերիոյ Դեսպանութեան Հետ

ՀՅԴ Ֆրանսայի Հայ դատի գրասենեակը կը հաղորդէ, որ ֆրանսահայ համայնքի պատուիրակութիւն մը, կազմուած՝ ՀՅԴ Ֆրանսայի Հայ դատի գրասենեակի եւ Ֆրանսահայ կազմակերպութիւններու համակարգող խորհուրդի ներկայացուցիչներէ, 21 Յունուարին հանդիպում ունեցաւ Փարիզի մէջ Զուիցերիոյ դեսպանատան բարձրագոյն անձնակազմին հետ՝ Տոդո Փերինչեքի հարցով դատարանի ծանօթ որոշումին կապակցութեամբ:

Մէկ ժամ տեւած հանդիպումին ընթացքին, հայկական պատուիրակութիւնը նախ եւ առաջ ընդգծեց, որ հայութիւնը, իբրեւ մէկ ամբողջութիւն՝ Հայաստան եւ սփիւռք, իր բոլոր հոսանքներով, միասնակա՛ն, կ'ակնկալէ, որ Պեռն իր որոշումին մէջ մնայ յանձնառու եւ հաստատակամ ու անպայման վերադատ կարգով դիմէ Եւրոպական դատարանին, որուն իրաւունքը սահմանուած է երեք ամիս՝ սկսեալ 17 Դեկտեմբեր 2013-էն: Պատուիրակութիւնը շեշտեց, որ այս ակնկալութիւնը համահայկական է եւ որ Զուիցերիա պարտի համապատասխան լուրջ ու յանձնառու կէցուածք որդեգրել:

Զուիցերիական կողմը ուշադիր արձանագրեց ամբողջ հանդիպման բովանդակութիւնը՝ քաղաքական, իրաւական, տնտեսական իր բաժանումներով, վստահեցուց, որ Պեռն ամենայն պատասխանատուութեամբ կը վերաբերի այս խնդիրին՝ հակառակ շրջագայող այն կարծիքին, թէ Զուիցերիա անհրաժեշտ ծանրութեամբ չի հակադէմ Եւրոպական դատարանի վճիռին, հաւաստելով, որ «նոյնիսկ եթէ ըստ տարածայնութեանց՝ Պեռնի վրայ եղած են ուղղակի թէ անուղղակի թրքական ճնշումներ, որ ճիշդ չէ, Զուիցերիա միշտ ալ կը պահպանէ իր գերիշխանութիւնը եւ իրեն յարիր քաղաքական չեզոքութիւնը»:

Նոյն օրը, մասնագիտական պատուիրակութիւն մը, բաղկացած՝ իրաւաբաններէ եւ օրէնսգէտներէ, իր կարգին ունեցաւ հանդիպում գուիցերիական միեւնոյն անձնակազմին հետ՝ քննարկելու այս անգամ զուտ իրաւական դաշտին վերաբերող կէտեր այս թղթածրարին առնչութեամբ:

Նախագահ Սարգսեան Մտահոգութիւն Կը Յայտնէ Ազրայէճանի Կողմէ Զինադադարի Դրութեան Խախտման Գծով

Հայաստանի նախագահ Սերժ Սարգսեան Չորեքշաբթի օր ընդունեց Հարաւային Կովկասի եւ Վրաստանի ճգնաժամի հարցերով Եւրոպական Միութեան յատուկ ներկայացուցիչ Ֆիլիփ Լեֆորը, որ Հայաստան ժամանած էր հրաժեշտի այցելութեամբ:

Նախագահի աշխատակազմի հասարակութեան եւ տեղեկատուութեան միջոցներու հետ կապերու վարչութիւնը կը փոխանցէ, որ նախագահ Սարգսեան ողջունեց այդ պաշտօնին վրայ Հայաստան վերջին այցելութիւնը կատարող Լեֆորը՝ ընդգծելով, որ Հարաւային Կովկասի մէջ Եւրոպական Միութեան յատուկ ներկայացուցիչի պաշտօնը կը վկայէ շրջանի անվտանգութեան եւ կայունութեան նկատմամբ Եւրոպական Միութեան հետաքրքրուածութեան մասին: Նախագահ Սարգսեան շնորհակալութիւն յայտնեց Ֆիլիփ Լեֆորին՝ Հայաստանի եւ Եւրոպական Միութեան միջեւ համագործակցութեան խորացման գործին մէջ անոր ունեցած

ներդրումին, ինչպես նաև շրջանային անվտանգության ու խաղաղության նպաստելուն ուղղուած ջանքերուն համար, եւ յաջողութիւն մաղթեց հետագայ աշխատանքին մէջ:

Հանդիպման ժամանակ անդրադառնալով նաև ԵԱՀԿ-ի Մինսքի խմբակի շրջանակներուն մէջ Լեռնային Ղարաբաղի տագնապի խաղաղ լուծման հոլովոյթին՝ նախագահ Սարգսեան խոր մտահոգութիւն յայտնեց վերջին օրերուն Ղարաբաղի եւ ազրպէյճանական զինեալ ուժերու շփման գիծին վրայ ազրպէյճանական կողմէն կատարուած շարունակական սադրանքներուն եւ զինադադարի խախտման դէպքերուն առնչութեամբ եւ ընդգծեց, որ անոնք լուրջ խոչընդոտ կը հանդիսանան բանակցային հոլովոյթի հետագայ յառաջընթացին համար:



Նալբանդեան – Լեֆոր Հանդիպումը

Չորեքշաբթի օր Հայաստանի արտաքին գործոց նախարար Էդուարդ Նալբանդեան նոյնպէս ընդունեց իր առաքելութիւնը աւարտող Հարաւային Կովկասի եւ Վրաստանի ճգնաժամի հարցերով Եւրոպական Միութեան յատուկ ներկայացուցիչ Ֆիլիփ Լեֆորը: Նախարար Նալբանդեան ի միջի այլոց Լեֆորի ուշադրութիւնը հրաւիրեց Ազրպէյճանի ռազմատենչ յայտարարութիւններուն եւ սադրիչ գործողութիւններուն վրայ: Նախարարը ընդգծեց, որ հակառակ ԵԱՀԿ-ի Մինսքի խմբակի եռանախագահ երկիրներուն կողմէ բազմիցս հնչող զինադադարի ամրապնդման անհրաժեշտութեան մասին կոչերուն եւ յորդորներուն, հայ-ազրպէյճանական սահմանին եւ Ազրպէյճանի ու Արցախի միջեւ շփման գիծին վրայ Ազրպէյճանի կողմէ զինադադարի դրութեան մնայուն խախտումներուն զոհ կ'երթան ոչ միայն զինուորներ: Նալբանդեան շեշտեց, որ նման սադրանքները կը խոչընդոտեն խաղաղ լուծման ուղղութեամբ համանախագահներուն եւ Հայաստանի կողմէ գործադրուող ջանքերը:

Ազգային Ժողովի Ոչ Իշխանական 4 Ուժերը Կը Փորձեն Միասնական Օրակարգ Մշակել

Չորեքշաբթի օր Հայաստանի Ազգային ժողովին մէջ ոչ իշխանական 4 քաղաքական խմբակցութիւններու՝ Բարգաւաճ Հայաստան կուսակցութեան, Հայ ազգային քնկրեսի, Ժառանգութեան եւ ՀՅԴ-ի ներկայացուցիչները կատարեցին հերթական միացեալ աշխատանքային խորհրդակցութիւնը: Այս մասին Ժառանգութիւն խմբակցութեան պատգամաւոր Ռուբէն Յակոբեան «Երկիր»-ին հետ հարցազրոյցին ընթացքին յայտնեց, որ խորհրդակցութեան ընթացքին քննարկուած են 4 քաղաքական ուժերուն հետագայ ընելիքները:

«Նպատակն էր առանձնացնել այն հարցերը, որոնք համաձայնեցուած փոխզիջումով պիտի դառնան միասնական օրակարգ, ինչ որ պիտի փորձենք իրականացնել Ազգային ժողովին մէջ», ըսաւ Ռուբէն Յակոբեան՝ ակեցնելով, որ երբ ուրուագծուին յստակ հարցերը եւ անոնց շուրջ միացեալ կերպով հանդէս գալու համաձայնութիւնները, (որովհետեւ իւրաքանչիւր խմբակցութիւն իր մէջ պէտք է քննարկէ այդ հարցերը), այդ ժամանակ փոխզիջումի արժանացած հարցերը պիտի հրապարակուին: Պատգամաւորը նշեց, որ անոնք այն առանցքային հարցերն են, որոնք այսօր կը յուզեն ազգաբնակչութիւնը: Խորհրդակցութեան ընթացքին քննարկուած է նաև 18 Յունուարի հանրահաւաքը եւ անիկա դրական գնահատուած է:

ՎԵՀԱՓԱՌ ՀԱՅՐԱՊԵՏԻՆ ԱՌԱՋԱՐԿ – ՈՒՂԵԳԻԾԸ “ԺՆՆԵԻ » ԻՆ

“ՈՂՋ ՔՐԻՍՏՈՆԷՈՒԹԻՒՆԸ ՆԵՑՈՒԿ ԿԸ ԿԱՆԳՆԻ ԺՆՆԵԻ 2-ԻՆ”

Ն.Ս.Օ.Տ.Տ. ԱՐԱՄ Ա. ԿԱԹՈՂԻԿՈՍ

“ՍՈՒՐԻՈՅ ՏԱԳՆԱՊԸ ՄԿՄԱԾ Է ՄՊԱՌՆԱԼ ԱՄԲՈՂՋ ԱՇԽԱՐՀԻՆ”

ԼԱԽՏԱՐ ԻՊՐԱՀԻՄԻ

Ժրնեւի Եկեղեցիներու Համաշխարհային Խորհուրդի կեդրոնատեղիին մէջ գումարուող միջազգային համագումարին, որուն բացումը կատարած էր Ն.Ս.Օ.Տ.Տ. Արամ Ա. Կաթողիկոս, երկրորդ օրը Վեհափառ Հայրապետը “Ժրնեւ 2”ին ղրկուելիք ուղեգիծին իր պատկերացումը պարզեց համագումարին: Յայտնենք, որ ԵՀԽ–ի կեդրոնատեղիին մէջ գումարուող համագումարին նպատակն էր “Ժրնեւ 2”ին ներկայացնել եկեղեցիներու հաւաքական տեսակետը:



Վեհափառ Հայրապետը, որ կարելոր դեր ունեցած էր համագումարի կազմակերպման աշխատանքներուն մէջ, ինը կէտերէ բաղկացած իր տեսակետը ներկայացուց հետեւեալ ձեւով.–

ա) **Զինադադարի անմիջական յայտարարութիւն** եւ սուրիական հողին վրայ տեղի ունեցող ամեն տեսակի բռնարարքներու եւ առեւանգումներու դադարում եւ առեւանգեալներու ազատ արձակում: Միացեալ Ազգերու Կազմակերպութեան ապահովական խորհուրդը պէտք է ազդու միջոցներու դիմէ Սուրիա մտնող զինամթերքի ինչպէս նաեւ օտար կռուողներու դադրեցման:

բ) Սուրիացի գաղթականներուն թէ՛ երկրէն ներս եւ թէ շրջակայ արաբական երկիրներէն ներս կատարուող **մարդասիրական օժանդակութիւնը** կազմակերպել եւ ներքին ամեն տեսակ շրջափակումները շուտով վերացնել:

գ) Սուրիական տագնապը կարելի չէ զենքի ուժով լուծել, այլ միայն՝ **քաղաքական երկխօսութեամբ**: Երկխօսութիւնն ու անոր յաջորդող գործընթացքը պէտք է ըլլայ համապարփակ, ծրագրուած եւ յառաջանայ յստակ ժամանակացոյցի մը համաձայն: Անոր պէտք է մասնակցին կառավարութիւնը, ընդդիմադրութիւնը, բոլոր համայնքներու ներկայացուցիչները եւ ընդհանրապէս քաղաքացիական հասարակութեան ներկայացուցիչները: Աշխարհաքաղաքական շահերը, շրջանային թէ միջազգային ուժերուն, միշտ ալ եղած են ի գին տեղական ժողովուրդներու շահերուն ու իրաւունքներուն: Սուրիական տագնապի “սուրիանականացում”ը լուծման առաջնորդող ազդու ճամբաներէն մէկը կրնայ ըլլալ:

դ) “Ժրնեւ 2”ը, որ վճռական դէպք մը կոչուած է դառնալու սուրիական տագնապի ծիրէն ներս, պէտք է վերածուի Սուրիան դէպի ամբողջական ու մնայուն խաղաղութիւն առաջնորդող **գործընթացքի**, որուն նպատակը պէտք է դառնայ նաեւ ժողովուրդին իրաւունքներու պաշտպանութիւնը եւ Սուրիոյ անկախութեան ապահովումը:

ե) Սուրիան խաղաղութեան առաջնորդող գործընթացքը պետք է զլխատրուի ու ղեկավարուի **սուրիացի ժողովուրդին կողմէ**: Այլ խօսքով՝ Սուրիոյ ժողովուրդը իր բաղկացուցիչ բոլոր տարրերով պետք է ինք ճշդէ իր երկրի ապագան: Այս ծիրէն ներս Արաբական Լիկայի, ՄԱԿ-ի եւ Միջազգային համայնքի ամբողջական աջակցութիւնը հրամայական է:

զ) Պէտք է ամէն գնով ապահովել Սուրիոյ **հողային ամբողջականութիւնը**: Ներ-համայնքային ու ներ-կրօնական հակասութիւնները ու բախումները, որոնք սկսած են դառնալ տիրական ամբողջ Միջին Արեւելքէն ներս, կրնան սուրիական ընկերութիւնը առաջնորդել ներքին բաժանումներու, որոնք իրենց կարգին, կրնան յառաջացնել նաեւ հողային բաժանումներ. վտանգալից երեւոյթ մը, որ կրնայ իր ժխտական անդրադարձը կրնայ ունենալ ամբողջ շրջանին վրայ:

է) Կրօնական, ցեղային ու համայնքային բազմազանութիւնը սուրիական ընկերութեան յատկանշական երեւոյթներէն մէկը եղած է միշտ: Զայն պէտք է պահել անվթար եւ այս ծիրէն ներս պէտք է ապահովել բոլոր սուրիացիներուն, համայնքներու թէ անհատներու, քաղաքացիական համահաւասար պարտաւորութիւններն ու իրաւունքները:

ը) **Մարդկային իրաւունքները** եւ ժողովրդավարական սկզբունքները անհրաժեշտ է պաշտպանել՝ այս ուղղութեամբ ի պահանջել հարկին փոփոխութիւններ կատարելով սահմանադրութենէն ինչպէս նաեւ՝ պետական կառոյցներէն ներս, ապահովելու համար բոլոր քաղաքացիներու մասնակցութիւնը Սուրիոյ հաւաքական կեանքին, բոլոր բնագաւառներէն ներս ու բոլոր մակարդակներու վրայ:

թ) Որպէս **քրիստոնէաներ**, մենք մեր հաւաքական ձայնը կը բարձրացնենք եւ վստահ ենք որ մեզի հետ են աշխարհի բոլոր կողմերը գտնուող բոլոր քրիստոնէաները: Մեր ձեռքը կ'երկարենք մեր իսլամ եղբայրներուն ու քոյրերուն, որոնց հետ Միջին Արեւելքէն ներս քրիստոնէաներ դարեր շարունակ գոյակցած են միասնաբար մեր գործօն մասնակցութիւնը բերելու Սուրիոյ վերականգնումի հաւաքական աշխատանքին՝ փոխադարձ հասկացողութեան, յարգանքի ու վստահութեան մթնոլորտի մէջ:



Վեհափառ Հայրապետին վերոյիշեալ առաջարկը միաձայնութեամբ ընդունուեցաւ համաժողովին կողմէ, որպէս հիմքը “Ժընեւ 2”ին ուղղուելիք ուղեգիծին:

ՀԱՆԴԻՊՈՒՄ ԼԱԽՏԱՐ ԻՊՐԱՀԻՄԻՆ ՀԵՏ

Համագումարի վերջին նիստին, ներկայ եղաւ Արաբական Լիկային եւ ՄԱԿ-ի կողմէ նշանակուած դեսպան Լախտար Իպրահիմի, որուն առաքելութիւնն էր կողմերուն միջեւ երկխօսութիւն յառաջացնել, որպէսզի անոնք կարենան միասնաբար Սուրիան առաջնորդել տագնապի լուծման:

Վեհափառ Հայրապետը նախ առանձին կարճ հանդիպում մը ունեցաւ Լախտար Իպրահիմիին հետ, որու ընթացքին ան ընդհանուր գծերով պարզեց համագումարին ընթացքը: Լախտար Իպրահիմիին գնահատեց Վեհափառ Հայրապետին վերջին անգլերէն գիրքը, ուր անդրադարձ կար “արաբական գարուն”ին ու քրիստոնէական համայնքներուն: Ան նաեւ յայտնեց, որ իր

ընտանիքէն ներս հայկական ներկայութիւն կայ, ու գնահատանքով անդրադարձաւ հայ ժողովուրդի մասին:

Համագումարին անունով խօսք առնելով, Վեհափառ Հայրապետը ողջունեց Լախտար Իպրահիմի ներկայութիւնը: Ան յիշեց, որ շուրջ 30 տարիներ առաջ Լախտար Իպրահիմի նոյն առաքելութեան լուծուած էր, այս անգամ Լիբանանի տազնապին գծով: Վեհափառ Հայրապետը ամփոփ կերպով պարզեց համագումարին քննարկումները եւ “Ժընեւ 2”ին փոխանցուելիք ուղեգիծը՝ ընդգծելով կարգ մը կէտեր ու շեշտելով, թէ քրիստոնէութիւնը ամբողջութեամբ նեցուկ կը կանգնի “Ժընեւ 2”ին , հաւատալով անոր ճակատագրական կարեւորութեան՝ ո՛չ միայն Սուրիոյ, այլ ամբողջ շրջանին համար:



Վեհափառ Հայրապետին յետոյ, խօսք առաւ Լախտար Իպրահիմի եւ իրապաշտ մօտեցումով պարզեց իր կատարած աշխատանքները, “Ժընեւ 2”ի օրակարգը եւ ընդհանրապէս սուրիական տազնապին ներկայ կացութիւնը: Լ. Իպրահիմին յստակ կերպով ըսաւ, թէ “սուրիական տանգապը սկսած է սպառնալ ո՛չ միայն Միջին Արեւելքին, այլ ամբողջ աշխարհին: Հետեւաբար, ա՛յս իրականութենէն մեկնելով, անհրաժեշտ է որ բոլոր կողմերը փոխադարձ զիջումներով Սուրիան առաջնորդեն դէպի աբոջական խաղաղութիւն”: Շարունակելով իր խօսքը, Լ. Իպրահիմին յիշեցուց, որ “դժբախտաբար, Սուրիկոյ առնչուած բոլոր կողմերը, շրջանային թէ միջազգային մակարդակներու վրայ, չին նպաստեր Սուրիոյ տազնապի լուծման, այլ ընդհակառակը, կը նպաստեն անոր առաւել խորացման, մեկնելով իրենց յատուկ շահերէն: “Ժընեւ 1”ը ձախողեցաւ այս պատճառով. “Ժընեւ 2”ը տեղի կ’ունենայ վերահաստատելու համար առաջին հերթին “Ժընեւ 2”ի որոշումները”:



Արդարեւ, Լ. Իպրահիմի իր մօտեցման մեջ այնքան իրապաշտ ու անկեղծ էր, որ նոյնիսկ երբեմն դարձաւ յոռետես: Ան ըսաւ “ես վստահ չեմ որ “Ժընեւ 2”ը պիտի յաջողի. ես նոյնիսկ վստահ չեմ, որ “Ժընեւ 2”ը տեղի պիտի ունենայ, հակառակ այն իրողութեան, որ միայն մի քանի օրեր մեզ կ’անջատեն “Ժընեւ 2”ի կայացումէն: “Ժընեւ 2”ի գումարման առաջնորդող մթնոլորտը յստակ չէ, որովհետեւ դիմադրութիւնը բաժնուած է, մեկ մասը կը մերժէ գալ, շրջանային կարգ մը երկիրներու մասնակցութեան վեթօ կը դրուի, որոշ կողմեր նախապայմաններով կ’ուզեն մասնակցիլ: Այս է ներկայ վիճակը:”

Լ. Իպրահիմ նաեւ ըսաւ, որ “Սուրիոյ կառավարութիւնը եւ դիմադրութիւնը կը ներկայացնեն միայն ժողովուրդին մէկ մասը: Ժողովուրդին մեծ մասը, լուռ մեծամասնութիւնը կը տառապի, ձայն չունի: Հետեւաբար, հանրային կարծիքին դերը կարեւոր է այս ուղղութեամբ: Այսքան մահ ու քանդում Սուրիայէն ներս, միջազգային համայնքին դիմաց, ներելի չէ: Ահա այս ուղղութեամբ կրօններ, այս պարագային իսլամութիւնն նու քրիստոնէութիւնը կարեւոր դեր ունին կատարելիք”: Իր խօսքի աւարտին, Լ. Իպրահիմին մեծապէս կարեւոր նկատեց Ե.Ճ.Խ.–ին այս նախաձեռնութիւնը ու մանաւանդ՝ պատրաստուած ուղեգիծը: Համագումարէն բխող ուղեցոյցը յաջորդ օրը յանձնուեցաւ Լ. Իպրահիմիին գայն ներկայցնելու համար “Ժընեւ 2”ին :

ՄԻՋԱԶԳԱՅԻՆ

Անգարայի Մէջ 470 Ոստիկաններ Պաշտօնէ Հեռացուած Են

Թրքական «Էն.Թի.Վի.» պատկերասփիւռի կայանը կը հաղորդէ, որ թրքական կառավարութիւնը ոստիկանութեան մէջ մաքրագործումի արշաւը շարունակելով՝ «Մեծ կաշառք» գայթակղութեան ծիրին մէջ Անգարայի մէջ պաշտօնէ արձակած է կամ այլ վայր փոխադրած 470 ոստիկաններ, որոնց շարքին նաեւ բարձրաստիճան սպաներ:

Միւս կողմէ, թրքական «Միլլիէթ» օրաթերթը հաղորդեց, որ Թուրքիոյ վարչապետ Ռեճեփ Թայիփ Էրտողանի գրասենեակէն ամիսներ առաջ յայտնաբերուած գաղտնալսումի սարքի ձայնային ազդանշան ստացող մասը յայտնաբերուած է Թուրքիոյ Գերագոյն դատարանի շէնքին տանիքին վրայ:

Օրաթերթը կը հաղորդէ, որ կառավարութեան ձեռնարկելիք հետագայ քայլերը յստակ պիտի դառնան, երբ Էրտողանի՝ Թուրքիա վերադառնալէն ետք անոր համապատասխան զեկուցում ներկայացուի:

Բացայայտումը կատարած է Թուրքիոյ ազգային հետախուզական ծառայութիւնը՝ ՄԻԹ-ը: Ի յայտ եկած է, որ Էրտողանի գրասենեակին մէջ տեղադրուած սարքը թեքնիք գետնի վրայ բաւական արդիական եղած է:

«Ժընէ-2»-ը Ընթացք Առաւ Հրապարակային Բուռն Վեճերով

Չորեքշաբթի օր առաւօտեան ժամը շուրջ 10:15-ին, Զուիցերիոյ Մոթրէօ քաղաքին մէջ ընթացք առաւ Սուրիոյ հարցով «Ժընէ-2» խորհրդածողովը, որուն կը մասնակցին 40 երկիրներու արտաքին գործոց նախարարները: Նախքան ժողովին ընթացք առնելը, Իրանի նախագահ Հասան Ռուհանի յայտարարեց, որ «բոլոր ցուցանիշները ցոյց կու տան, որ մեծ յոյսեր պետք չէ կապել, որ «Ժընէ-2» խորհրդածողովը սուրիացի ժողովուրդին հարցերուն եւ ահաբեկչութեան դէմ պայքարի լուծումի մը կը հասնի»: Ռուսիոյ Տումայի արտաքին յարաբերութեանց յանձնախումբի նախագահ Ալեքսէյ Փուշքով իր կարգին յայտնեց, որ «Իրանը «Ժընէ-2» խորհրդածողովէն հեռու պահելը խորհրդածողովի յաջողութեան պիտի չնպաստէ»՝ աւելցնելով, որ «անոնք Իրանի դէմ կը պայքարին, երբ Սուրիոյ մէջ գլխաւոր հարցը ծայրայեղականութիւնն է»:

«Մայատին» արբանեակային պատկերասփիւռի կայանը հաղորդեց, որ Մոթրէոյի մէջ խորհրդածողովի սկիզբէն առաջ Ռուսիոյ արտաքին գործոց նախարար Սերկէյ Լաւրով եւ Միացեալ Նահանգներու արտաքին գործոց նախարար Ճոն Քերրիի համաձայնութիւն գոյացուցած են, որ «Ժընէ-2»-ի նպատակը Սուրիան միացեալ, անկախ, ժողովրդավար եւ աշխարհիկ պետութիւն մը դարձնելն է: «Մայատին» նաեւ հաղորդեց, որ սուրիական իշխանութեան եւ ընդդիմութեան միջեւ բանակցութիւնները ընթացք պիտի առնեն ուրբաթ օր եւ աւարտին յառաջիկայ ուրբաթ օր:

ՄԱԿ-ի ընդհանուր քարտուղար Պան Քի Մուն խորհրդածողովի բացման արարողութեան ընթացքին իր արտասանած խօսքին ընթացքին յայտնեց, որ «սուրիական կառավարութեան եւ

ընդդիմութեան առջեւ սուրիացի ժողովուրդի տառապանքին վերջ տալու մեծ առիթ մը գոյութիւն ունի»: Ան ըսաւ, որ բոլոր կողմերը սուրիական տագնապը յարանուանական հարցի վերածեցին՝ աւելցնելով, որ Սուրիոյ վարչակարգը ճշդէլու պատասխանատուութիւնը սուրիացիներուն կը պատկանի: Ան նաեւ նշեց, որ բոլոր կողմերը կը ձգտին քաղաքական լուծումի մը, որ այլընտրանք չունի:

Ռուսիոյ արտաքին գործոց նախարար Սերկէյ Լաւրով իր արտասանած խօսքին մէջ յայտնեց, որ «մեր հասարակաց առաքելութիւնը սուրիական ողբերգութեան վերջ տալն է, եւ Ամերիկայի հետ միացեալ աշխատանքով ու հաղորդակցութեամբ այս գործը իր աւարտին պիտի հասցուի»՝ աւելցնելով, որ լուծումը միայն Սուրիոյ տագնապի կողմերուն միջեւ ազգային ու քաղաքական երկխօսութեան ճամբով պիտի ըլլայ:

Լաւրով յայտնեց, որ իրենք Միացեալ Նահանգներու հետ պիտի գործակցին, որպէսզի ջանք թափուի գործադրելու համար «Ժընեւ-1»-ի հաղորդագրութեան կէտերը, որոնք կը նշեն, որ անհրաժեշտ է ընթացքին շուրջ համաձայնութիւն գոյացնել եւ զգուշանալ խաղաղ հոլովոյթը արգելակելէ՝ աւելցնելով, որ պէտք է յարգել քրիստոնեաները, որոնք 2000 տարի իսլամներուն կողքին ապրած են, սակայն տագնապը զանոնք գաղթի մղած է եւ իսլամներուն միջեւ վիհը խորացուցած:

Ռուսական դիւանագիտութեան պետը ընդգծեց, որ Ժընեւի հաղորդագրութեան գործադրութեան համար պէտք է Իրանը մասնակից դարձնել: Ան ըսաւ, որ խորհրդաժողովին պարտականութիւնը Սուրիոյ աղէտալի տագնապին վերջ տալն ու շրջանին մէջ անոր տարածումը կանխարգիլելն է:

Միացեալ Նահանգներու արտաքին գործոց նախարար Ճոն Քերրի յայտնեց, որ «Սուրիոյ նախագահ Պաշշար Ասատ Սուրիոյ մէջ փոխանցման կառավարութեան մաս պիտի չկազմէ, որովհետեւ չենք կրնար երեւակայել ձեւ մը, որ իր ժողովուրդը չարչարած պատասխանատու անձնաւորութիւն մը այս կառավարութեան մէջ ըլլայ»: Ան յայտնեց, որ իրենք յանձնառու են գտնելու ձեւ մը, որուն ճամբով սուրիացի ժողովուրդը իր իշխանաւորները ընտրէ՝ աւելցնելով, որ միակ արգելքը մէկ անձի եւ մէկ ընտանիքի իշխանութեան կառչիլն է:

Քերրի ըսաւ, որ իրենք Ժընեւի հաղորդագրութիւնը գործադրելու առումով յանձնառու են, եւ իրենց պարտաւորութիւնը զայն գործադրելն է: Ան սուրիական վարչակարգը ամբաստանեց ահաբեկչութեան Սուրիա մուտք գործելու առիթ ընծայելու յանցանքով:

Սուրիոյ արտաքին գործոց նախարար Ուալիտ Մոալլեմ ցաւ յայտնեց, որ «կարգ մը երկիրներու ներկայացուցիչներ մեզի հետ նստած են եւ անոնց ձեռքերը սուրիացիներուն արեամբ ներկուած են»՝ աւելցնելով, որ Սուրիոյ կայունութիւնը քայքայել ուզողներուն դիմակը ինկած է: Ան հարց տուաւ, որ «չեչեն, թուրք, սէուտցի կամ բրիտանացի ահաբեկիչը ինչպէ՞ս կրնայ սուրիացի ժողովուրդին ձգտումները իրականացնել»:

«Այն ինչ որ Սուրիոյ մէջ տեղի կ'ունենայ յեղափոխութեան անուան տակ արտասահմանէն եկող ահաբեկչութիւն է», որ սուրիական յեղափոխութեան տրամադրեց «մարդկային կերպարանքով գազաններ», նկատել տուաւ Մոալլեմ: Ան ընդգծեց, որ այն ինչ որ տեղի ունեցաւ կարելի պիտի չըլլար՝ առանց Թուրքիոյ վարչապետ Ռեճեփ Թայիփ Էրտողանի ղեկավարութեամբ թրքական կառավարութեան, որ ահաբեկիչներուն ամէն դիւրութիւն ընծայեց եւ ահա այսօր ատոր գինը կը վճարէ, եւ «ան որ պատմութենէն չի սորվիր, պիտի պարտուի, սակայն կարգ մը դրացիներ Սուրիոյ մէջ կրակ վառեցին»:

Սուրիոյ դիւանագիտութեան պետը ըսաւ, որ Սուրիա անհրաժեշտ ձեւով ինքզինք պաշտպանելու համար ամէն բան պիտի ընէ: «Եթէ Սուրիոյ մէջ մարդասիրական կացութենէն մտահոգ էք, ապա դադրեցէք միջամտելէ», ըսաւ ան:

Մոալլեմ խօսքը ուղղակիօրէն Քերրիին ուղղելով յայտնեց, որ «աշխարհի վրայ ոչ ոք իրաւունք ունի օրինականութիւն պարգեւելու բացի սուրիացիներէն»: «Մենք պիտի շարունակենք ահաբեկչութիւնը հարուածել եւ եկանք, որպէսզի բոլորը իրենց պարտաւորութեան առջեւ դնենք, որովհետեւ քաղաքական գործունէութիւնն ու ահաբեկչութիւնը չեն կրնար մէկ գիծի վրայ ըլլալ», ըսաւ ան՝ աւելցնելով, որ «հիմնականը երկխօսութիւնն է, եւ կ'ըսենք, որ միջսուրիական երկխօսութիւնը Սուրիոյ հողերուն վրայ է»:



Նշենք, որ Քի Մունի եւ Մոալլեմի միջեւ վեճ մը ծաւալեցաւ, երբ վերջինս իւրաքանչիւր խօսք առնողի յատկացուած 10 վայրկեանը շրջանցեց: Մոալլեմ խնդրեց մէկ նախադասութիւն եւս արտասանել, Քի Մուն խնդրեց, որ իր խոստումը յարգէ, որուն Մոալլեմ պատասխանեց. «Սուրիա միշտ իր խոստումները կը յարգէ»: Մոալլեմի խօսքի աւարտէն ետք, ՄԱԿ-ի ընդհանուր քարտուղարը ներկաներուն կոչ ուղղեց «բարի կամեցողութեամբ խորհրդածողովին մասնակցող» երկիրներուն հասցէին ուղղակի ամբաստանութիւններ չուղղել եւ գրգռիչ արտայայտութիւններ չունենալ:

Սուրիական ընդդիմադիր եւ յեղափոխական ուժերու Ազգային համաձայնական մարմինի նախագահ Ահմետ Շարպա իր արտասանած խօսքին մէջ յայտնեց, որ իրենք խորհրդածողովին ներկայացած են ամբողջական կերպով համաձայն գտնուելով Քի Մունի ուղղած հրաւերին, որ կ'ակնարկէր «Ժընեւ-1» որոշումներուն գործադրութեան եւ փոխանցման կառավարութեան կազմութեան, «որ «Ժընեւ -2»-ի միակ նիւթն է»՝ աւելցնելով, որ Ասասի իշխանութեան վրայ մնալու մասին որեւէ խօսք «Ժընեւ-1»-ի հոլովոյթէն դուրս գալ կը նշանակէ:

Շարպա Սուրիոյ կառավարութեան պատուիրակութեան կոչ ուղղեց՝ «Ժընեւ-1»-ի հաղորդագրութիւնը ստորագրելու: Ան ըսաւ, որ Սուրիական ազատ բանակը պայքար կը մղէ վարչակազմին կողմէ Սուրիա հրաւիրուած ահաբեկիչներուն, մասնաւորաբար Հրզպալլայի դէմ, «որ այսօր Լա Չէյի մէջ կը դատուի Լիբանանի նախկին վարչապետ Ռաֆիք Հարիրին ու Լիբանանի մէջ կարծիքի տէր ղեկավարները սպաննելուն համար: Աշխարհի վրայ անոր ահաբեկչական արարքները ծանօթ են»՝ աւելցնելով, որ Սուրիական ազատ բանակը իրանեան Յեղափոխական պահակազունդին դէմ եւս կը կռուի:

«Զենքի ուժով ինքնապաշտպանութիւնը մեր ընտրանքը չէր, սակայն այդ ընտրանքը մեզի պարտադրուեցաւ», ըսաւ ան՝ աւելցնելով, որ «Ապահովութեան խորհուրդին մէջ վեթոն մեզ մոռնեց»:

Չինաստանի արտաքին գործոց նախարար Ուանկ Եի յայտնեց, որ «Ժընեւ-2» խորհրդածողովը «պէտք է Սուրիոյ պատմութեան սկիզբը ըլլայ»՝ յոյս յայտնելով, որ Սուրիա նոր հանգրուան մը սկսի, բարգաւաճ կեանք մը ապրի եւ միջազգային ընտանիքին յարգուած անդամներէն մէկը ըլլայ: Ան ըսաւ, որ «որքան ալ տագնապները բիրտ ըլլան, կրնանք զանոնք քաղաքական գետնի վրայ լուծել, եթէ բարի կամք եւ լուրջ աշխատանք ըլլայ»՝ շեշտելով, որ այդ ամբողջը

իրագործելու համար պետք է աշխատիլ: «Մեր նպատակը Սուրիոյ մէջ բռնաբարքներու դադրեցումն է՝ առ ի պատրաստութիւն խաղաղ բանակցութեանց», նշեց ան՝ Միջին Արեւելքի կայունութեան մէջ կարեւորութիւնը շեշտելով, «որպէսզի պատակտումը շրջանին մէջ չտարածուի»: Ուանկ Լի ընդգծեց, որ պետք է դուրսէն քաղաքական լուծումներ պարտադրել զգուշանալ:

Բրիտանիոյ արտաքին գործոց նախարար Ուիլիըմ Հէյկ զգուշացուց, որ եթէ խորհրդածողովը ձախողի, ապա հարիւր հազարաւոր սուրիացիներ այդ ձախողութեան գինը պիտի վճարեն: Ան սուրիական երկու պատուիրակութեանց կոչ ուղղեց բանակցութեանց ձեռնարկելու՝ քաջ գիտնալով, որ Սուրիոյ ճակատագիրը խնդրոյ առարկայ է, եւ իրենք պետք է իրենց պատասխանատուութեանց տէր կանգնին: «Ժընեւ-2»-ը պետք է քաղաքական լուծումի առաջնորդէ», ըսաւ ան:

Թուրքիոյ արտաքին գործոց նախարար Ահմեթ Տաւութօղլու յայտնեց, որ «սուրիական ընդդիմութիւնը սուրիացի ժողովուրդը ներկայացնելուն, իր պայքարին կառչած մնալուն եւ տագնապին լուծումի մը հասնելու փաստը տուաւ»՝ հարց տալով, որ «սուրիական վարչակարգի ներկայացուցիչները ամօթ չեն զգար, ինչպէ՞ս իրենք զիրենք անմեղ կը յաւակնին ըլլալ»:

«Աշխարհի մէջ միլիոնաւոր ահաբեկիչներ կան, որոնք կը փորձեն Սուրիոյ մէջ ապաստանարան մը գտնել, եւ բոլորս գիտենք, թէ Սուրիոյ մէջ ահաբեկիչները որո՞նք են», ըսաւ ան՝ աւելցնելով, որ «Սուրիոյ նախագահ Պաշշար Ասատի վարչակարգի քաղաքականութեանց պատճառով համայնքայնութեան երեւոյթը վատթարացաւ»: Ան ցաւ յայտնեց գոյութեանը համար սուրիական կառավարութեան նման կառավարութեան մը, որ «քաղաքայիններուն տառապանքը երբեք չի զգար»:

Տաւութօղլու բոլորին կոչ ուղղեց իրենց պատասխանատուութեանց տէր կանգնելու եւ սկսելու փոխանցման հանգրուանի մը, որ «ուժեղ ու ժողովրդավար» Սուրիա մը պիտի կառուցէ: «Թուրքիա Սուրիոյ մէջ քաղաքական լուծումին կը հաւատայ», ըսաւ ան՝ աւելցնելով, որ «պետք է ամբողջական լիազօրութեան տէր փոխանցման իշխող մարմին մը կազմել»:

Մէուտական Արաբիոյ արտաքին գործոց նախարար Մէուտ Ֆայսալ իշխանը յայտնեց, որ «անհրաժեշտ է «Ժընեւ-1» խորհրդածողովի կէտերուն յանձնառու ըլլալ եւ զանոնք գործադրել»: Ան կոչ ուղղեց կազմելու փոխանցման կառավարութիւն մը, որ ամբողջական լիազօրութիւններ ունի, «եւ բնական է, որ Սուրիոյ նախագահ Պաշշար Ասատ կամ իր ձեռքերը արիւնով ներկուած ռեւէ այլ անձ այս դասաւորման մէջ որեւէ տեղ չունենայ»:

Մէուտական դիւանագիտութեան պետը կոչ ուղղեց, որ «օտար ուժերը դուրս գան Սուրիայէն, մասնաւորաբար իրանեան Յեղափոխական պահակագունդի ուժերն ու Հրզապլայի միլիսականները, քաղաքներու պաշարումը վերցուի» եւ մարդասիրական օժանդակութեանց մատակարարման համար միջազգային վերահսկողութեամբ ապահով միջանցքներ յառաջացուին:

Ան նշեց, որ «սուրիացի ժողովուրդի օրինական ներկայացուցիչը Ազգային համաձայնական մարմինն է»՝ աւելցնելով, որ իրենք խորհրդածողովին ներկայ գտնուած են հիմնուելով այն երաշխիքներուն վրայ, թէ ասոր նպատակը «Ժընեւ-1»-ը ամբողջական կերպով գործադրելն է, «եւ գիտենք, որ անոր ամենէն կարեւոր կէտը ամբողջական լիազօրութեանց տէր փոխանցման կառավարութեան կազմութիւնն է»:

ԼՈՒՐԵՐ ԳԱՂՈՒԹՆԵՐԷՆ

Թեհրան

Իրանի «Միփան» միության Հիմնադիր-Նախագահ Նորայր Էլսայեան Պարզեատրուեցաւ «Մայրենիի դեսպան» Շքանշանով

Դեկտեմբեր 28-ին Հայաստանի սփիւռքի նախարար Հրանուշ Յակոբեան ընդունեց Իրանի «Միփան» միության հիմնադիր-նախագահ Նորայր Էլսայեանը, միության նախկին նախագահ Մերուժ Սուքիասեանը եւ Հայաստանի մէջ «Ալիք» օրաթերթի ներկայացուցիչ Տիգրան Դաւթեանը:



Նախարար Հրանուշ Յակոբեան, բարձր գնահատելով բազմավաստակ մանկավարժ, միության ղեկավար Նորայր Էլսայեանի հայրենանուէր գործունէութիւնը, սփիւռքի մէջ մայրենի լեզուի անաղարտութեան պահպանման, Հայաստան-սփիւռք գործակցութեան զարգացման նշանակալի ծառայութիւններ մատուցելուն համար եւ միության հիմնադրման 50-ամեակին առիթով Նորայր Էլսայեանը պարգևատրեց Հայաստանի սփիւռքի նախարարութեան «Մայրենիի դեսպան» շքանշանով:

Նորայր Էլսայեան շնորհակալութիւն յայտնեց Հայաստանի սփիւռքի նախարար Հրանուշ Յակոբեանին՝ նման բարձր պարգևի համար եւ նշեց, որ միության 50-ամեակը մեծ շուքով նշուած է նաեւ Թեհրանի եւ Լոս Անճելըսի մէջ:

Թեհրանի Հայոց Թեմի Առաջնորդ Սեպուհ Արք. Սարգիսեանի Հանդիպումները

* Յունուար 8-ին Սպահանի եւ հարաւային իրանահայութեան երեսփոխան Ռոպերթ Բեգլարեան շնորհաւորական այցելութիւն մը տուաւ սրբազան հօր:



Սրբազան հայրը ջերմօրէն ողջունեց Բեգլարեանին ներկայութիւնը եւ յաջողութիւն մաղթեց անոր: Հանդիպումը առիթ եղաւ միասին զրուցելու ազգային ու շրջանային հարցերու եւ յատկապէս սուրիահայութեան ներկայ դժուար կացութեան մասին:

* Յունուար 9-ին Թեհրանի հայոց թեմի առաջնորդ Սեպուհ արք. Սարգիսեան ընդունեց ՀՄՄ «Նայիրի» միության նուիրահաւաքի յանձնախումբին այցելութիւնը: Յանձնախումբը զեկուցեց «Նայիրի» միության շինարարական աշխատանքներուն մասին: Սրբազան հայրը մեծապէս գնահատեց յանձնախումբին նախաձեռնութիւնը, քաջալերեց զանոնք եւ թելադրեց, որ հաստատակամ հաւատքով շարունակեն գործել: Ան նաեւ խոստացաւ իր կարգին ուղղակի եւ անուղղակի միջոցներով օգտակար դառնալ միության շինարարական աշխատանքներուն, որպէսզի կարճ ժամանակամիջոցին մէջ աւարտին:



Վրաստան

**Սերգեյ Փարաջանովի Ծննդեան
90-ամեակի Նշում**



Նախաձեռնությամբ վիրահայոց թեմի «Հայարտուն» կեդրոնին, համագործակցությամբ լուսանկարիչ Եուրի Մեչիտովի, աջակցությամբ Հայաստանի մշակոյթի նախարարութեան, 9 Յունուարին տեղի ունեցաւ Սերգեյ Փարաջանովին նուիրուած յուշ-երեկոյ:

Թիֆլիսի Ս. Էջմիածին եկեղեցոյ մէջ տեղի ունեցած հոգեհանգստեան արարողութենէն ետք «Հայարտուն» կեդրոնին մէջ գործադրուեցաւ գեղարուեստական յայտագիր:


Վիրահայոց թեմի «Հայարտուն» կեդրոնի համակարգող Լևոն Չիթիլեանի բարի գալուստի խօսքէն ետք Եուրի Մեչիտով խօսք առնելով՝ անդրադարձաւ՝ Սերգեյ Փարաջանովի հանճարին, անոր երեւակայական աշխարհին, գեղեցիկը ընկալելու եւ վերարտադրելու զանազան դրսեւորումներուն, հանճարեղ ստեղծագործողի դաստիարակիչ խօսքի ազդեցութեան: Ան նաեւ դրուագներ պատմեց Սերգեյ Փարաջանովի կեանքին: Ելոյթ ունեցաւ նաեւ թատրոնի նախկին բեմադրիչ Միքայէլ Գրիգորեան:

Ներկաները դիտեցին Ռոն Հոլլովէյի «Փարաջանով. ռեքուիեմ» վաւերագրական ժապաւէնը:

Յայտնենք, որ կազմակերպուած էր նաեւ Սերգեյ Փարաջանովի լուսանկարներու ցուցահանդէս:

Քանատա

**ՀՅԴ Քանատայի Երիտասարդական
Միութեան Սեմինարը Նուիրուած Էր
Բեկոր Աշոտի Յիշատակին**



Յունուար 10-12-ին ՀՅԴ Քանատայի երիտասարդական միութեան «Լևոն Շանթ» եւ «Բեկոր Աշոտ» մասնաճիւղի 40 անդամներ հաւաքուեցան Քեպէքի «Արիւնտել» բանակավայրը՝ իրենց տարեկան ձմեռնային սեմինարի աշխատանքները համադրելու համար:

Բանակում-սեմինարը նուիրուած էր Արցախի ազատամարտիկ Բեկոր Աշոտի յիշատակին, իսկ սեմինարի կարգախօսն էր Բեկորի խօսքը՝ «Ամէն հայ պիտի զգայ, որ առանց իրեն հայրենիքը կը փլուի»: Բանակումի ընթացքին ցուցադրուեցաւ

Բեկոր Աշոտին նուիրուած վաւերագրական ժապաւէն մը: Սեմինարի ընթացքին ՔԵՄ-ականներուն փոխանցուեցան շարք մը դաստիարակչական նիւթեր:

ՄՆՆԴԱԳԻՏԱԿԱՆ

10 Հնարք՝ Նուազ Ուտելու Համար

Կ'ուզեք նուազեցնել ձեր ուտելիքին քանակը, բայց չեք գիտեր՝ ինչպե՛ս ընել առաջափնի՝ 10 հնարներ, որոնք պիտի օգնեն ձեզի նուազ ուտելու:

1. Ընտրեցեք պզտիկ պնակներ: Այն տպաւորութիւնը պիտի ունենաք, որ ձեր պնակը բերնէ բերան լեցուն է, բայց եւ այնպէս ձեր կերակուրին քանակը շատ աւելի պակաս պիտի ըլլայ, քան այն, որ պիտի լեցնէին խոշոր պնակի մը մէջ:

2. Օրական առնուազն 8 բաժակ ջուր խմեցեք: Ջուրը կը պակսեցնէ անօթութեան զգացումը եւ կը մաքրէ մարմինը: Ջուրին մէջ կիտրոնի կամ որեւէ այլ պտուղի շերտեր աւելցուցեք անոր յաւելեալ համ տալու համար:



3. Դանդաղ կերեք: Ձեր կարելին ըրեք չաճապարելու եւ դանդաղ ուտելու համար: Պատառները թող ըլլան փոքրիկ եւ երկար ծամեցեք զանոնք: Երբ արագ կ'ուտեք, ուղեղը «չի լսեր» կշտացումի նշանները եւ դուք աւելի ու աւելի կ'ուտեք:

4. Օրական 3 ժամի փոխարէն՝ 5 ժամ կերեք: Պարզապէս ամբողջ օրուան ձեր ուտելիքը 5 ժամի բաժնեցեք: Այդ ժամերէն մէկը թող բաղկացած ըլլայ ընկոյզէ, կաղինէ, քաժոյէ, չամիչէ, ծիրանէ եւ այլն... Անշուշտ այս բոլորը մէկուկէս տուրձի գաւաթը պէտք չէ անցնի:



5. Խուսափեցեք պատրաստ թացաններէն, որոնք հարուստ են իւղով եւ շաքարով: Վնասակար թացանները փոխարինեցեք թարմ խտտերով (ծոթրին, ռեհան, ագատքեղ, կանաչ սոխ...) եւ համեմներով:

6. Խուսափեցեք մեծաքանակ կերակուր պատրաստելէ: Անիմաստ է 6 հոգիի կերակուր պատրաստելը, երբ դուք 3 հոգի էք: Յաջորդ օրը չուտելու պարագային, շատ հաւանական է, որ աւելցուք աղբաման հասնի եւ կամ մսխումէ հրաժարելու համար ստիպուիք աւելի ուտել:

7. Երբ ճաշարան կ'երթաք, մեծաքանակ ապսպրանքներ մի՛ ընէք. նաեւ մտածեցեք տեսականի մը երկուքով կիսուելու հնարաւորութեան մասին:

8. Հրաժարեցեք «տայէթ» կոչուած ուտելիքներէն, որոնք «սուտ բարեկամներ» են: Նախապատուութիւնը տուէք թարմ բանջարեղէններուն (վարունգ, ստեպոլին, պրոքոլի...) եւ պտուղներուն:

9. Ուտելու ժամանակ ուրիշ բանով մի՛ զբաղիք: Ո՛չ պատկերասփիւռ դիտեցեք, ո՛չ ալ ձեր բջիջայինով զբաղեցեք: Ասոնք կ'արգիլեն, որ կեղրոնանաք ձեր կերակուրին եւ կշտացումի վրայ. հետեւաբար անգիտակցաբար կ'ուտեք աւելին:

10. Հրաժարեցեք տուրմի, շաքարեղէնի եւ կրկնէփներու մեծաքանակ պահեստներէն: Որքան ուտելիք ունենանք մեր ձեռքին տակ, այնքան ուտելու փորձութեան կ'ենթարկուինք: